

Sámit čeahkkanit digaštallat

Guovvamánu 6.b. jagi 1917 čeahkkanedje sihke Norgga ja Ruota sámit Troandimii. Dat lei historjjálaš dáhpáhus, go dat ii lean dáhpáhuvvan ovdal. Sii čeahkkanedje digaštallat áššiid mat guske buot sámiide. Dat ledje áššit dego bohccuid guohtoneatnamat ja sámi mánaid oahpahusdilli. Elsa Laula Renberg lei vitmadis nisu, ja dat lei son gii plánii ja ásahii dán čeahkkima.

Sámi álbmotbeaivi ja sámi leavga

Ollu sámit ávvudit guovvamánu 6. beaivve mii gohčoduvvo Sámi álbmotbeaivin. Ávvudeapmi dáhpáhuvvá iešguđet lágai miehtá Sámi Norg-

gas, Ruotas, Suomas ja Ruoššas. Dáinna lágiin sii muittašit dan beaivvi go Elsa Laula ja eará sámit čeahkkanedje digaštallat oktasaš áššiid maid sii demokráhtalaččat ovddastedje eiseválddiide.

Sámi leavga lea guovddázis dán beaivvi. Dan lea Astrid Båhl hábmen, ja dat dohkkehuvvui jagi 1986. Rukses riekkis lea beaivváš ja alit riekkis lea mánnu. Njeallje ivnni ovddastit dan njeallje riikka gos sámit ássat; Norga, Suopma, Ruotta ja Ruošša. Jorbadas galgá muittuhit goavdá.



Sámi riikačeahkkin jagi 1917.



Elsa Laula Renberg.